

**IN FUNERE  
SIGISMUNDI  
CHRISTOPHORI  
COMITIS AB  
HERBERSTEIN...**

---

Giovanni Angelo Guidarelli







Ex Legato D. Equit. Antonij Francisci des Marnij

IN FUNERE  
SIGISMUNDI CHRISTOPHORI  
COMITIS

Ab

HERBERSTEIN  
EPISCOPI LABACENSIS  
S. R. IMPERIJ PRINCIPIS

ORATIO

*Perusæ habita in Templo augustissimo D. Petri  
Castinensium*

Idibus Sextil : MDCCXVI.

1058  
3



PERUSIÆ MDCCXVI.  
Apud Constantinum Impress. Camer.

---

SUPERIORUM PERMISSU,



6547-10

*Imprimatur*  
Pro Illustrissimo, ac Reverendissimo Domino Perusæ Episcopo  
N. N. Lib: Censor Synod.



*Imprimatur*  
Fr. Paulus de Octavianis Ord. Prædicatorum Inquisitor Generalis  
Perusæ &c.

ILLUSTRISSIMO, & EXCELLENTISSIMO D.

D. LEOPOLDO COMITI AB  
HERBERSTEIN

*Apud*

CAROLUM VI.

CÆS. AUG.

REGEM CATHOLICUM &c.

CONSILIARIO STATUS  
PROPRÆSIDI BELICO  
GENERALI POLEMARCHO  
PEDITUM TRIBUNO

PRÆTORIÆ SAGITTARIORUM COHORTIS DUCI

S. P. D.

*J. Fridericus de Floramontibus*



Utiuq;ssimum obitum Sigismundi Chri-  
stophori Fratris tui [ Illustrissime & Excellentissime  
Comes ] communibus lacrymis deflevit J. Angelus  
Guidarelli Perusinus, Laurentianę Basilicę Canoni-  
cus,

4  
cus, in Patrio Augusto Lyceo Etlicorum ac Rhetoricorum Interpres Emeritus, Perusine Eloquentie facile princeps. Laudatio pre amplitudine nobilissime Familie vestre tumultuaria, & minus absoluta fortassis videri poterit; sed deficiens rerum cognitio, ac temporis angustie veniam debunt. Est tamen etiam pregnans, & succi plena, vel certe sine fuco, & ingenua, hoc est tanti Presulis moribus digna, Eam typis vulgandam curavi; tibi que, cui uni debebatur, unus pre omnibus nuncupatam volui, qui unus pre ceteris debui; ut tam multa nomina, quibus obstringor, si minus per me expungam, aliena saltem ope profitear. Faxit Deus ut rei publice ac tibi diutissime vivas: meque ut clientem addictissimum, & virtutum tuarum cultorem precipuum patrocinio humanissimo fovere pergas supplex rogo. Vale Perusie  
Postridie Idus August. MDCCXVI.

Et



# ORATIO



**N**os infelices nuper audivimus latè grassantem per circumlectas urbes mortis acerbiter: atque utinam audire tantummodo satis fuisset; vidimus & sensimus intra domesticos parietes febrium cohortem, alicubi quidem feliciter fugatam loco cedere, alibi verò nullis medicæ artis fractam conatibus adhuc insultare. Vidimus advenas, inquilinos, indigenas post paucissimas morbi hebdomades moriendi necessitatem subire. Vidimus conjugales thalamos misere desolatos relinqui, matres-familias viduitatis damna deplorare, natorum manipulos orbitatis solatia incassum queritare. Sed divino tandem beneficio mitius nobiscum agi cœpit, & decrescente in dies morborum vi mortem libatis aliquot dumtaxat hominum centurijs arma paulatim deponere gratulamur. Gratulamur, dixi? Heu dicti pœnitet. Proh Superi, quantam dolemus in uno capite jacturam! SIGISMUNDUM CHRISTOPHORUM COMITEM ab HERBERSTEIN S. R. Imperij Principem, virum clarissimo loco natum, dignitate, virtute, ac moribus præstantissimum, invida, inexorabilis mors eripuit; nulli certe flebiliorem ( ausim dicere ) quàm mihi, quo nec ratio familiariter uti humanissimè voluit. Videant itaque qui me ad ingratum hoc officium adegerunt reluctantem, quid afferre huc valeam ex dignitate argumenri, homo valetudinarius, rude jam dudum donatus, senex capularis, præ doloris vehementia parum compos mentis, fandi propemodum ignarus. Aliquid tamen enitar utcumque: & quoniam ad nobilitatis laudem plurimum confert patriæ dignitas, quid augustius cogitari potest, quàm natale HERBERSTEIN solum, Germania? Citra iniuriam aliarum regionum dictum volo. Germani jure optimo dicuntur Aborigines, seu indigenæ, qui post terrarum omnium eluvionem quas primùm incolverunt sedes, & quo sermone genuino semel uti cœperunt, eadem prorsus perpetua possessione obtinent, minimèque aliarum gentium peregrinitate, aut barbarorum colluvie infecti, nunquam alieno mancipati servitio, nunquam satis domiti, Romanorum arma fortiter propulsare, plurimasque illorum legiones ad internecionem delere in more habuerunt. Gens strenua quidem bellisque gerendis apertissima, nullo tamen astu corrupta, fallere aut simulare nescia, æquitatis amantissima; legibus naturæ libentius quàm scriptis parere, miserationem & hospitalitatem impense colere assueta; Romano Imperio ultra novem sæcula intra suos fines sedem præbuit firmissimam. Potest-ne quidquam Germanica Nobilitate præstantius ostentari, cum eæ præsertim familiæ apud Italos, aliosque clarissimæ habeantur, quibus antiqua dederint initia Germaniæ proceres lectissimi? Hanc itaque synceram claritudinis suæ parentem & altricem bonis avibus sortita est Herbersteiniana Familia, virorum omni laude dignissimorum, maxime

maximè frœcunda, in plures veluti ramos diffusa, semper & ubique florentissima. Possem hic ex antiquitatis penu depromere majorum ceras & imagines, honestissimum gratie locum apud Cæsares ferme omnes Augustissimæ Stupis Austriacæ laudabiliter inirum, cum plausu retentum; possem equestres Hierosolymitanæ ac Theutonicæ militiæ tesseras nobilissimas hic recensere, Præfaturas, Dynastias, Prætorios fasces, Legationes amplissimas, Sapientie decora non vulgaria, pecunie cudendæ jura, multiplices & longè clarissimos affinitatum nexos, quibus se gens Herberstenia cum tam multis nobilissimis devinxit, insignes victorias, trophæa illustria. Peculiarem hic sibi locum deposcerent Sigismundi nostri fratres germani natu minores duo, Henricus pridem vita functus Theutonicæ Ordinis Commendatarius Viennensis ac Neosoladiensis vir sane fortis ac disciplinæ militaris experientissimus; Leopoldus alter adhuc superstes non uni Cæsari a Consilii primæ notæ, summus bellorum Proprius, Generalis Polmarchus, Prætorie sagittariorum cohortis Dux. Quid Fr. J. Ferdinandus Herberstenius ad-huc vivens, ad omnes Melitenis Militiæ gradus, munia, & honores circa supremum, evectus? Quid Sigismundi Christophori proneptis, Regni Neapolitani nunc Proregina? Sed me t. n. d. m. reprehendo, ne videar familiæ nunquam satis laudatæ præconium adornasse, Sigismundi nostri oblitus, in quo gentis suæ pars magna laudis sita erat; perinde ac si laudari aliunde non possit, quam ab ips rebus, quas extra se positas, uti alienas, non magni facere consueverat. Cætera illius indoles parem habuit educationem, Ernesto Frederico Comite patre, viro æque cordato ac pio, sat agente, ut vitæ sanctioris institutis hic imbueretur primo loco genitus, aris destinatus, quæ animi propensio in puero luculenter emicabat. Grecij in patria disciplinis liberalibus excultus, vix adhuc pubescens, Basilicæ Uratislaviensis, & Sanctæ Crucis Canonicus renunciatur Serenissimo Leopoldo Gulielmo Austriaco inibi tunc temporis Antistite largiente. Sed ne in Clericalem militiam adlectus, & eximjis ornatus Sacerdotijs, atq; adeò jam Deo dicatus, ea, quæ ad Deum, ignorarer; Romam Religionis syncretæ Magistrum petens, Germanico in Ephœbeo Theologicæ facultati penitus addiscendæ quadriennio toto perpetem operam addixit, strenuam, singularem. Viget ibi nondum oblitterata recordatio ingenij, quo Sigismundus Herberstenius egregie pollebat, industria qua in Studijs assiduus, accubans diu noctuque utebatur, vitæ ac morum, probitatis, qua cæteris præstabat, & præibat exemplo. Quæ virtutum commundatione motus Alexander septimus summus Sacrorum, & Literarum, Antistes, ingeniorum, & probitatis asstimator sapientissimus, adhuc inter Germanicos alumnos commorantem, Canonicum etiam Ratisponensem promociavit: eumque honoris gradus ac titulos, qui absoluto studiorum curriculum amplissimi solent decerni, ex merito adeptum, in patriam rediturum Pontifex sanctissimus discrete laudavit. Sed augescenribus meritis nova succrescunt honorum insignia: Labacensis Ecclesiæ Præpositura confertur, sequentur postmodum majoris inibi dignitatis tyrocinium; & intra non multos annos Augustanus Canonicatus, deinde Passaviensis, interea dimissis Uratislaviensi ac Ratisponensi; cum Rudolpho-vertenis item Præpositura, jurisdictione ferme Episcopali prædita; Labacensis tandem Insula Leopoldo

Augu-

Augusto, & Undecimo Innocentio volentibus. Hic enimvero dignus Herberstenij virtutibus datus est locus perspicue ostendendi, quam providè divino consilio designentur Ecclesiarum Præsules, Pastores animarum. Non enim quantam in summo imperatore deligendo Romani veteres postulabant scientiam rei militaris, virtutem, auctoritatem, felicitatem; sed multò plures easque maximas virtutes hic inesse oportet; ita ut nullam prorsus mente concipere possimus virtutem, quam ab animarum ductoribus abesse aliquando contingat. Quàm intenta itaque ac vigil in Herberstenio eluxit Pastoralis sollicitudo: quam egregiam laudem ab universæ Germaniæ Episcopis merito reportavit, quamvis laudum omnino negligens, & contemptor! Quàm liberalis ac ferne prodigus, ubi pauperum præsertim ageretur causa, patrimonium suum effecerat egenorum patrimonium, pupillorum ærarium! Quid de moribus castigatissimis dicam, & ad summæ sanctimonie regulam temperatis, prorsus ut solo etiam aspectu fortè obvio aliquando faterentur homines vel perditæ sese divinitus commoveri, & quod non semel evenit, ad bonam frugem revocatos, probitatem & ipsos alè imbibere Præsulis auctoritate & exemplo didicisse? Quid de pietate summa & cultu erga Deum & Coelites, quibus si minùs vacare posset tempore diurno, rebus utiliter & præclare gerendis intentus, maximam nocturnæ quietis partem dabat quotidie vir sanè horarum omnium, totus curarum, totus pariter & precum? Quid de nobili illa ac pene regia totius oris, habitus, incessus dignitate, qua tantum splendoris rebus sacris addebat, ut ille inter præcipuos ad Ecclesiasticæ majestatis normam factus omnino videretur. An prætereunda est silentio æquabilis illa cum animi tum vultus hilaritas in rebus adversis æquè atque in secundis, humanitas, modestia, & illa præsertim mansuetudo suavissima, qua ut alter Horromæus aut Salesius nullam ægrè ferebat aut sentiebat offensam, præter quam Dei? Maluit tamen plerunque Julij Agricola exemplo *videri invenisse bonos, quàm fecisse*. Quis satis & pro dignitate recenseat quàm amabilem indolem ad interitum usque servaverit nullam, morum asperitatem insuavem, quantam sine arrogantia magnitudinem, dignitatem sine fastu, quantam innocentiam, integritatem animi, comitatem, quàm faciles auditus, admissiones inemptas, dulces assatus, oblatam ultro consilij & auxilij facultatem? Regis Numæ religionem, atque unà Titi Caesaris lenitatem raro fœdere coniungens ita singulos devinxit, ut animos coegeret vel ferreos ad pietatis officia & amoris. Plausum dabant quotidie felicissimæ urbis tranquillitas, justitiæ tenor perpetuus, parva quies, facta securitas. Quis enim non sponte legibus pareret, sacrarum legum vindice Herberstenio, ex cuius vitæ morumque disciplina, innocentie, modestie, amabilitatis exempla peterentur? Quis pacem & caritatem non amaret Sigismundo Christophoro Antistite, pacatissima cujus suavitas animorum illecebra, quod vix terror valuisset aliis efficere, facile id assequeretur aut imitatione sui, aut beneficiis? Subdolas verborum blanditias & Aulæ fucos sancte oderat vir candidus & simplex ac verè Germanus, probè doctus animarum Pastoribus nihil esse commune cum Tiberij vafro ingenio, & longo distare intervallo Paulum a Tacito. Hinc ejus orationi plurimum inerat dignitatis, plurimum & fidei: nunquam suspecta & obscura verba sermo-

nem

nem in incertum & ambiguum implicabant, nunquam inani spe supplices lactare assuetus, nunquam promissi fidem fallere, nisi cum fortè religio animo incaussa revocaret. Hinc ingens ille juveni ac benemerendi ardor ita in omnes effusus, ut quantum in eo esset, singuli sentirent; quibus enim potuit profuit, nocuit nulli. Et mirabimur fortasse si Labacenses omnes tantus perculit doloris sensus, cum septendecim annis ab accepta Infula elapsis, migrationem Perusinam adornaret? Videre erat cuiusvis ordinis & ætatis homines Antistitis amatissimi genua complexos affusis abunde lacrymis retardare conari, ac discessum præpedire, squalere omnia, urbem atque oppida, ululare, erumpere undique mœrorem ac luctum, ubique exaudiri sletus & ejulatus. Sed nimium urgebat sancta cupiditas sibi vivendi & Deo. Annuentibus itaque CLEMENTE UNDECIMO ac LEOPOLDO PRIMO, vinculis omnibus atque impedimentis solutus anno primo ac septingentesimo ultra millesimum, Perusiam advenit (o hos felices!) aptissimum secessui urbem, sorte privata intimè fruendus. Quàm piè, quam sanctè hic vitam per quindecim annos transegerit, cum in comperto sit, referre superfedeo, id unum coronidis loco additurus, quod corporis afflictationem cucullato homine dignam manifestò arguit. Et fuit, cum secretiorem ejus suppellectilem post obitum scrutantibus deprehensa sunt tandem duæ horribiles zonæ, retrusæ & oblucæ ut visum fallerent, ex cilicio altera, altera ferreis denticulis instructa, pretiosissimæ sanctitatis opes quavis regia gaza nobiliores. Quid nos multarum deliciarum humunciones; ubi tam duriter innocentiam suam plectunt viri nobilissimi, liberaliter educati, annosi? Nihil ergo mirum sit si Heleonora Augustina Cæsaria uxor & parens, sicuti Ducem sanctum vocitari gaudebat Leopoldum Comitem Herberstenium, ita Sigismundum Christophorum fratrem Episcopum sanctum meritò appellabat. Ita, sicut Basilij Megel domus universa Sanctorum familia dicebatur; rara hac prærogativa Herberstenijs nunc attributa, frui dabitur & Sigefrido fratri postremo, superstiti a hac, Divi Benedicti Monachorum parentis instituta professo. Nec mirum si UNDECIMUS CLEMENS BEATISSIMUS, quoties Perusinum aliquem ad pedum oscula libenter sinebat admitti; de Sigismundi Herberstenij rebus ac virtutibus multa quæreretur, ejusque pium secessum cum aliquo sensu emulationis commendaret: & vir nobilissimus Gulielmus Comes Leslaus Vienna Antistes, quoties ad Herberstenium nostrum literas daret, post salutationis officia, sese cupidissimum imitandi Herberstenium profitebatur. Sed tandem ingravescentibus morbis, viribusque jam prostratis, Sigismundus, oculis in Cœlum, quò anhelabat, continenter defixis, spiritum in manus Domini crebrius commendans, annorum plenus & meritum ad Cœlites evolavit: quos in terris degens & venerandus colere, & sanctis virtutibus studuit imitari. Tū verò Cœlo receptus, ut piè nos credere sancti tui mores docent, doloris nostri ob gravissimam jacturam significationes, funebri hac etiam apparatissima pompa datas, amplissimis licet promeritis tuis longè impares, gratas habere nobisque tui amantissimis, post mortalis vite cædia hinc abituris, propitius viam sternere.







